

pendiorum partem, tum compendiorum tribuant reipublicæ, Veronæ, Brixia, Bergomi, Cremæ, Cremonæque, atque Flaminia magistratibus item exceptis, & iis qui ultra finem Phanaticum sunt missi, qui omnes quartam modo partem earum utrarumque rerum conferant: satis enim magna alteris incommoda bellum esse ipsum allaturum, alteris iter longum & impeditum jam attulisse, ne aliis etiam oneribus ferendis æque ac cæteri affligerentur. Eam legem, uti dictum est, cum Senatus jussisset, majora quoque comitia triduo post habita pari studio jusserunt. Latum est etiam, uti exules illatae fortuito mortis causa, qui una cum quatuor bello idoneis hominibus militiam reipublicæ menses quatuor sua pecunia fecerint, ab exilio revocentur.

Legatus deinde Bergomatibus est datus Marinus Georgius, Ariminensibus Aloisius Armerius, qui eis in oppidis administrando bello præsent. Interim cum a Petro Lando Patres certiores facti essent, ab Julianis copiis incursionem in Reipublicæ fines fieri, abigique prædas, & agrestes homines vulgo interfici, vel captos in vinculis adduci, eadem est in Julii finibus patranda exercitui reipublicæ a Senatu facultas tradita: Laurentiusque Sagredus præfectus classis in Flaminia Picenique litoribus suis cum navibus Ariminum contendere est jussus. Cumque hostium numerus in Cremonæ finibus Abduæque ripis vehementer augetetur, castellaque ad eos & pagi aliquot defecissent, uti naves aliæ adverso Padis flumine in Galliam mitterentur, aliæ in lacu Benaco armarentur, lex est lata: præfectique alteri classi Sebastianus Maurus, alteri Zacharias Lauredanus dati. Gaspar etiam Severinas, qui Cesenæ erat, seque reipublicæ obtulerat, & Antonellus Neapolitanus cum turmis equitum ad reipublicæ militiam sunt conscripti: atque hic quidem, quod erat plane dives, confectis in urbe testamenti tabulis templi Marcii procuratores ex asse sibi hæredes instituit, atque ad bellum profectus est. Leonardus etiam Pratus, e Lupis Apuliæ oppido, ex societate Rhodiorum militum, se ad rempublicam

*Antonelli
Neapolitani
& Leonardi
Prati, ad-
venarum, in
Remp. libe-
ralitas.*